



Broj: 13-15.01-920/13

Datum: 04.10.2013. godine

Komisija za papire od vrijednosti Brčko distrikta BiH na osnovu člana 65 Zakona o papirima od vrijednosti Brčko distrikta BiH ("Službeni glasnik Brčko distrikta BiH", broj 15/03,27/04,42/04,28/07 i 14/12) na 62 sjednici, održanoj dana 04.10.2013. godine d o n o s i

ODLUKU
O NAČINU UTROŠKA SREDSTAVA ZA REPREZENTACIJU I POKLONE
U KOMISIJI ZA PAPIRE OD VRIJEDNOSTI BRČKO DISTRIKTA BOSNE I HERCEGOVINE

Član 1.
(Predmet)

Ovom odlukom utvrđuje se način utroška sredstava za reprezentaciju i sredstava za nabavku poklona (u daljnjem tekstu: sredstva) u Komisiji za papire od vrijednosti Brčko distrikta Bosne i Hercegovine (u daljnjem tekstu: Komisija).

Član 2.
(Osnovni pojmovi)

Pojedini izrazi upotrijebljeni u ovoj odluci imaju sljedeće značenje:

- a) „**troškovi reprezentacije**“ su troškovi jela i pića koja se poslužuju tokom ili nakon sastanka sa službenim strankama, a koji se javljaju u vezi s obavljanjem poslova Komisije
- b) „**službene stranke**“ su predstavnici državnih organa vlasti u Bosni i Hercegovini i institucija tržišta kapitala u BiH, predstavnici drugih država i međunarodnih organizacija, privrednih subjekata i nevladinih organizacija kao i predstavnici drugih organa javne uprave i institucija Brčko distrikta BiH kada je sastanak u vezi s djelatnošću Komisije;
- c) „**poklonom**“ se smatra svaka isplata, djelovanje, usluga ili predmet od vrijednosti učinjen neposredno primaocu, bez naknade ili očekivanja naknade, što naročito podrazumijeva: novac, stvari, usluge bez naknade, ugostiteljsku uslugu, usluge noćenja, putni trošak ili sličnu uslugu, umjetnički predmet, suvenir, računarsku opremu i drugu tehničku opremu, poslovne poklone, prehrambene poklone, cvijeće, osiguranje ili sličnu uslugu i medicinsku ili sličnu uslugu, a tokom: posjeta i obilježavanja prigodnih događaja.

Član 3.
(Ovlaštenja)

(1) Novčana sredstva namijenjena za reprezentaciju i poklone mogu se trošiti pod uslovom da u tekućem budžetu Brčko distrikta BiH (u daljnjem tekstu: budžet) postoje odobrena sredstva na organizacionom i ekonomskom kodu Komisije za tu vrstu troška.

(2) Korisnik prava na troškove reprezentacije (u daljnjem tekstu: korisnik) je predsjednik Komisije ili zamjenik predsjednika Komisije u njegovoj odsutnosti.

Član 4.
(Dokumentovanje reprezentacije)

- (1) Reprezentacija mora biti dokumentovana na način da se neposrednim uvidom u odgovarajuće isprave može utvrditi:
 - a) naručilac reprezentacije;
 - b) korisnik reprezentacije;
 - c) dobavljač reprezentacije;
 - d) obim utroška reprezentacije.
- (2) Obavezne isprave kojima se vrši dokumentovanje činjenica iz stava (1) ovog člana su:
 - a) račun dobavljača;
 - b) profaktura potpisana od naručioca – korisnika ako se plaćanje vrši avansno;
 - c) specifikacija troškova;
 - d) kratak opis radnje povodom koje nastaje trošak za reprezentaciju u objektima van prostorija Komisije.

Član 5.
(Unutrašnja reprezentacija)

- (1) Unutrašnja reprezentacija je reprezentacija koja obuhvata trošenje sredstava reprezentacije korištenjem usluga dobavljača odabranog u skladu s propisima o javnim nabavkama, čija je uslužna jedinica iz koje se vrše usluge reprezentacije unutar Brčko distrikta BiH (u daljnjem tekstu: Distrikta).
- (2) Pravo na unutrašnju reprezentaciju imaju korisnici iz člana 3. stava (2) ove odluke.

Član 6.
(Manifestacije)

- (1) U slučaju organizacije manifestacije, predsjednik Komisije donosi odluku o imenovanju organizacionog odbora manifestacije.
- (2) Organizacioni odbor manifestacije sačinjava prijedlog programa manifestacije i dostavlja ga predsjedniku Komisije.
- (3) Predsjednik Komisije pismeno odobrava Program manifestacije.

Član 7.
(Pravo na nabavku poklona)

- (1) Pravo na nabavku predmeta u svrhu poklona i davanja poklona u ime Komisije imaju predsjednik Komisije i zamjenik predsjednika Komisije pod uslovom da u tekućem budžetu imaju odobrena sredstva na odgovarajućem organizacionom i ekonomskom kodu Komisije.
- (2) Pojedinačna vrijednost poklona ne može biti veća od 500,00 KM.

Član 8.
(Evidencija poklona)

- (1) Komisija uspostavlja evidenciju (zapisnik) predmeta nabavljenih za korištenje u svrhu poklona, kao i evidenciju izdatih predmeta u svrhu poklona.
- (2) Evidencija predmeta nabavljenih za svrhu poklona vodi se na obrascu koji je sastavni dio ove odluke (Prilog 1), a istu je dužan voditi član Komisije.
- (3) Evidencija podijeljenih predmeta u svrhu poklona vodi se na obrascu koji je sastavni dio ove odluke (Prilog 2), a istu je dužan voditi administrator zaposlen u Komisije.

Član 9.
(Prijem poklona)

- (1) Zaposleni u Komisiji mogu primiti poklon kada je to u skladu s važećim propisima i kada ne postoje razlozi zbog kojih ih ne treba primiti.
- (2) Zaposlenici Komisije ne mogu biti korisnici poklona koje nabavlja Komisija.
- (3) Izuzetak od stava (2) ovog člana su pokloni koji se dodjeljuju zaposlenim povodom: obilježavanja prigodnih događaja, datuma ili praznika, odlaska u penziju i u slučaju smrti zaposlenika ili člana njegove uže porodice.

Član 10.
(Obrasci-prilozi)

Sastavni dio ove odluke čine obrasci: Prilog 1 – Evidencija predmeta nabavljenih u svrhu poklona i Prilog 2 – Registar datih poklona.

Član 11.
(Stupanje na snagu)

Ova odluka stupa na snagu danom donošenja i objavit će se u „Službenom glasniku Brčko distrikta BiH“.

Predsjednik
Komisije za papire od vrijednosti
Brčko distrikta BiH

Mirsad Bešlagić

